

**TEZAUUR LITURGIC**  
**2 DECEMBRIE**

**SLUJBA**  
**SF.CUVIOS**  
**PORFIRIE**  
**BAIRAKTARIS**  
**DE LA**  
**KAVSOKALIVIA-**  
**ATHOS**



**MOSCOVA, 2000**



# **СЛУЖБА** **преподобному и Богоносному** **отцу Порфирию** **Кавсковаливиту**

## **НА ВЕЧЕРНИ**

На Господи, возвах: стихиры, глас 4:  
Священник богодухновеннейший, / избран  
сосуд честный, / утешитель велий наречеса, /  
совершая превысокая и Божественная любви  
Божия Таинства, / яко Ангелов превысший /  
послужил еси всех Владыце по достоянию; //  
сего ради ты вси чтим, возлюбленне Порфирие.  
Уязвлен рачением ко Господу, Порфирие  
всеблаженне, / мирския вещи презрел еси, /  
богоугодно жительство твое прошел, радуясь, /  
Божественных же заповедей делатель  
усерднейший явился еси, / возлюбив всякого  
человека в мире, // сего ради в Пристанищи  
Небеснем ныне веселишися.  
Преподобным единомысленный, / добродетели  
всяцей научился еси из детства, святе, /  
Божественным стопам последовав, / пребыл еси  
яко столп неподвижим / и благодатей Троицы  
содержитель, Порфирие: / темже днесь святую  
твою память празднующе, // Бога в радости

благодаряще, славим.

Светом сияя неприступным, / яко звезда,  
просиял еси еллинским людем, / добродетельми  
тех просвещая, отче Порфирие, / и ныне  
точииши благодать исцелений // несомненною  
душею приступающим к тебе.

Слава, глас 1:

Отреклся еси плоти Христа ради / и духовный  
явился еси народоводитель, / монахов был еси  
честное правило / и страсти вся крепко попрах  
еси. / Тем и демонов коварство до конца  
испепелил еси / и недужным здравие даровал  
еси; / к Богу зря всегда, Богоносе Порфирие, /  
моли грехов оставление даровати // чтущим  
любовию святую память твою.

И ныне, Богородичен, глас тойже:

Всемирную славу / от человек прозябшую / и  
Владыку рождшую, / Небесную дверь воспоим,  
Марию Деву, / Безплотных песнь и верных  
удобрение: / Сия бо явися небо и храм  
Божества; / Сия преграждение вражды  
разрушивши, / мир введе и Царствие отверзе. /  
Сию убо имуще веры утверждение, / Поборника  
имамы из Нея рождшагося Господа. / Дерзайте  
убо, дерзайте, людие Божии, / ибо Той победит  
враги, // яко Всесилен.

На стиховне стихиры, глас 2:

Пастырскому художеству незлобием обучився, /  
отечески паству твою научал еси страху Божию,  
/ Порфирие, отче блаженне, / образ праведных  
жизни в себе явивый, / любовь же милующую  
молитвою стяжал еси. / Тем к тебе, яко дивному  
угоднику Божию, припадающе, просим: /  
молися Господеви / мир миру даровати // и  
душам нашим велию милость.

Стих: Честна пред Господом / смерть  
преподобных Его.

Преподобне отче Порфирие, / светлая твоя  
память / освящает наша души благоуханием  
добродетелей, / всем являючи, имиже Богу  
угодил еси / и чудотворец изряден явился еси, /  
дарами Духа Святаго сияя. / И ныне, отче,  
твоими молитвами нас озари / и молися ко  
Господу, ты прославльшему, // да спасет души  
наша.

Стих: Блажен муж, бояйся Господа, / в  
заповедех Его восхощет зело.

Мудростию украшаяся и разумом просвещаяся,  
/ смирением сердца красуясь, / и высотой  
жития, досточудне, / в разумные дворы вшел  
еси, // идеже нас поминай, чтущих тя,  
Порфирие блаженне.

Слава, глас 6:

Имел еси душу милостиву, отче Порфирие, / и  
чист помысл, и сердце нестропотно, / и веру  
нескверную, и любовь нелицемерную. / Темже  
почитаем тя священными песньми / и  
благочестно вси ублажаем // на молитвы твоя  
уповающе.

И ныне, Богородичен, глас тойже:

Творец и Избавитель мой, Пречистая, / Христос  
Господь, из Твоих ложесн прошед, / в мя  
оболкийся, первыя клятвы Адама свободи. /  
Темже Ти, Всечистая, / яко Божии Матери же и  
Деве, / воистинну вопием немолчно: / радуйся,  
Ангельски, радуйся, Владычице, /  
предстательство и покрове, // и спасение душ  
наших.

Тропарь, глас 4:

Апостольскою ревностию жительствуя / и  
Христово имя непрестанно призывая, / всем  
любовь Божию проповедуя, / в той всегда  
пребывал еси, / многия души исцеляя и ко  
воскресшему Господу приводя. / Потщися и  
настави нас, отче Порфирие преподобне, // да  
приидем и мы во объятия Божия, славяще  
предстательство твое.



Слава, и ныне, Богородичен, глас тойже:  
Еже от века утаеное / и Ангелом несведомое  
таинство, / Тобою, Богородице, сущим на земли  
явися Бог, / в неслитном соединении воплощаем  
/ и, Крест волею нас ради восприим, / имже  
воскресив первозданного, // спасе от смерти  
души наша.

## НА УТРЕНИ

Канон, глас 1

Песнь 1.

Ирмос: Христос рождается, славите:

Христова друга искренняго, / Христова  
священнодейственника теплейшаго, / Христова  
честнаго послушника, вси Порфирия  
Кавсокаливийскаго, вернии, / радуящися, в  
песнях да восхвалим.

Играют мирстии концы, людие вселенныя  
радуются, / ликовствуют небесная, сонмы  
священников и инокующих воспевают согласно  
/ в памяти Порфирия богомудраго.

О чудесе! Како от юности ты претерпел еси с  
родительми разлучение, / не побежден  
естественною любовью? / Возгорися сердце твое  
рачением еже к Богу / и яко свет сияше уму  
твоему Иоанна Кущника образ.

Божия испроси благодати нам, взыскующим помощи, / и любовь к тебе притекающим, / Божественным осенением и заступлением, таинниче неизреченный, о Порфирие мудре, / яко да воспеваем тя.

Богородичен: Сосуд благодати сущи, сердце мое радования исполни, / и Господу и Сыну Твоему, Дево, усердно о всех верных всегда молися.

### Песнь 3.

Ирмос: Прежде век:

Кроткому и смиренному сердцем Господу Иисусу подражая, смирен мудрованием, кроток и послушлив ты был еси, от Негоже и благодать тебе, Порфирие, даровася.

Житие твое, яко солнце, возсия, преподобне, светлыми деянии, монашествующих лики просветил еси и демонскую тьму отгнал еси. Якоже Илия на колеснице, отче Порфирие, добродетельми твоими возшел еси на Небо и тамо чисте зриши Святую Троицу, к Ней же духом горя и возлетая.

Богородичен: Спасение родила еси человеком и обновление принесла еси нам, обетшавшим грехми, Дево, Мати Божия.



Седален, глас 3:

Словесами евангельскими озаряемь, / в пути,  
ведущий к жизни, Божественным сиянием  
ходив верно, / вражиих отбег прилогов, / сын  
света и дне явился еси, // Порфирие  
Богоблаженне.

Слава, и ныне, Богородичен:

Пречистеи Твои руце, Дево Мати, простерши, /  
покрый уповающия на Тя и к Сыну Твоему  
зовущия: // всем подаждь, Христе, Твою  
милость.

Песнь 4.

Ирмос: Жезл из корене:

Всем притекающим к тебе показался еси чистый  
источник радости, надежды и исцелений, /  
росою животочных вод окропляяй души, отче  
блаженне.

Агнца Божия закалаемого за грех всего мира  
зрел еси сердечными очима, отче, священную  
Евхаристию совершающе, таже и ныне  
воздержи твои праведниируцы к Престолу  
Божью за люди твоя, тя почитающих.

Отец преискренний показался еси, отче  
Порфирие, пастве твоей, любовью своею  
согревающий сердца чад твоих.

Богородичен: Возсия из утробы Твоея,  
Отроковице Неискусобрачная, Отчее сияние —

Христос, и просвети вселенную и бесовскую тьму потребил есть.

### Песнь 5.

Ирмос: Бог сый мира:

От Афонскаго затвора твоего уединеннаго песни благоумиленно, хвалы и славословия Христу Богу воспевал еси присно, Порфирие блаженне, Того Божественное снисхождение прославляя.

Естеством кроток и милостив, не остави нас, на твоя молитвы уповающих и молящихся тебе, покрый нас, отче, от навет вражиих святыми твоими молитвами и пути наша направи.

Образ добродетелей был еси пастве твоей, Богопросвещенный наставниче наш Порфирие, от всякия злыя вещи удален: яко да избавиши нас от соблазна, преткновения и кознодейства вражия.

Богородичен: Закона исполнение, высшая Херувим, родила еси Божия Слова воплощена, Сына Единородна, Егоже о рабех Твоих умоли.

### Песнь 6.

Ирмос: Из утробы Иону:

Образ был еси верным: словом, житием, любовью, сего ради вселися в тя Дух Святый, отче Богоносе, и нам, помолися, стяжати благодать Того.

Истине Евангельской с детства наученный,  
животворныя заповеди Спасовы исполнил еси  
ревностно, отче Порфирие, и явился еси  
проповедник деятельный пути спасительнаго.  
Предведый Бог, отче Порфирие, твоей души  
красоту и разума чистоту,  
священнопроповедника мудра людям показа тя.  
Богородичен: Милости Твоея, Богородице,  
сподоби мя, премилостиваго Слова рождшая,  
Своею Кровию от тли человеки избавльшаго.

Кондак, глас 3:

Радуйся, Афона смиренное овча, / Порфирие,  
Любве проповедниче, / монахов славо, святых  
удобрение. Овому бо Духом дадеша слово  
премудрости, / другому же слово разума и  
действия сил, тебе же купно вся открывшася, /  
яко таиннику Божия благодати.

Песнь 7.

Ирмос: Из утробы Иону:

Мудростию вышнею очистив телесная и  
душевные чувства, премудре, / возжег сердце  
Божественным рачением, / и со Ангелы Богу  
усердно поеша ныне: / отцев Боже, благословен  
еси.

В болезнях горьких взывал еси радостно,  
Порфирие, / мне еже жити Христос и еже

умрети приобретение многое, / не престану бо воспевати милость Его и вопити: отцев Боже, благословен еси.

Повеления отеческая храня невредимо, правоверным смыслом, ты от юности имел еси житие чисто и милостивен нрав, Порфирие досточудне и ко Творцу всех взывал еси: отцев Боже, благословен еси.

Слово твое, мудростию срастворенное и Божию благодатию преудобренное, / радостию насыщает и веселием верных сердца, иже поют любвию: / отцев Боже, благословен еси.

Богородичен: Радуйся, Владычице Дево, яко всем людям похвала еси, непрестанно молися Христу Богу сохранить град сей и люди молитвами всеблаженного Порфирия.

## Песнь 8.

Ирмос: Чудо преестественное:

Отец чадолюбивый был еси всем приходящим к тебе со скорбию сердечною и нуждою, и никтоже неутешен отыде от твоего лица, блаженне.

К тебе, отче Порфирие, припадающе, умиленным гласом вопием: посети немощи наша, буди ходатай о нас, тебе ради благословящих Христа во веки.

Рай истинно соделал еси пустыню, в ней

преиззяществовав во всякой добродетели, темже и рая сладости сподобился еси, Порфирие преподобне.

Богородичен: Бога нам родила еси, Пречистая Богорадованная Дево, спаси место сие и люди, на Тя уповающия, Богородице Пренепорочная, и Сыну Твоему вопиющия: благословите Христа во веки.

### Песнь 9.

Ирмос: Таинство странное вижду:

Красно убо Церковь веселится в памяти твоей, о пастырю дивный отче Порфирие! Вернии же людие стекаются, празднственная тебе приносяще, восхваляюще Христа, тебе прославльшаго.

Обрати свой взор с превыспренних высот на нас, в памяти твоей ликующих и Христа славословящих, и отеческим твоим благословением осени всех, пастырю священнейший Порфирие.

Весь во Свет Божественная Троицы с веселием прешел еси, ангельским воинством ныне срадуешися, пречудне отче Порфирие, с нимиже непрестанно моли всем спастися, поющим тя.

Богородичен: Юже воспевают Силы Небесныя, Владычицу Деву, Церкви красоту, верных

державу и похвалу, благодарно величаю и пение  
скончаваю.

Светилен:

Светом Превечнаго сияния озарився, отче  
Порфирие, Христу последовал еси, и Того  
благодатию просветився, источник чудес и  
милостей явился еси, сего ради молим тя: спаси  
души наша.

Слава, и ныне, Богородичен:

Зарю пресветлую, являющую нам Солнце  
незаходимое, вемы, Тя, Пресвятая Дево  
Богородице. Сего ради молим Тя: яко Мати  
Света сущи, просвети нас светом Сына Твоего,  
Христа Бога нашего.

[Выкладываю в «Уставные заметки» текст  
службы преподобному Порфирию  
Кавсокаливиту (†1991, память 19 ноября).  
Служба составлена клириком города Одессы  
(Украинская Православная Церковь)  
**протоиереем Илией Тетерько.**]